

Saugrippe ond andere Viechereia

Noch dr Vogelgrippe, em Rinderwahnsinn und dr Schweinepescht hend mir endlich wieder ebbes, wo mr Angscht drvor han kennat – ond wo wieder a paar Pharmariesa en Sauhaufa Geld verdiena kennat. An dr normale Grippe sterbat alloi en Deutschland jährlich viel meh' Menscha, als bisher auf dr ganze Welt an dr Saugrippe erkrankt send.

Nochdem des Mittel Tamiflu, des mr vor zwoi Jahr wega dr Vogelgrippe en de meischte Großstädt a'gschaft hot, jetzt per Verfallsdatum abglaufa ischt, brauchat dia Pharmafirma oifach wieder a nuis Mittele, mit dem se wega dr Angscht von de Leut en Haufa Geld ei'sacka kennat. Außerdem ka dodrmit dui Bundesregierong wunderbar von ihre Wirtschaftsproblem ablenka. Schließlich kommat em Herbst Wahla!

Aber dia Leit drehat total durch. Mei Nochbr hot geschtern sein beschta A'zug en da Müll gschmissa. Wo i en gfrogt han, wieso er des do häb, antwortet der, dass dr Tagesschausprecher gsait häb, die Schweinegrippe sei im Anzug.



Selbst die Viecher drehat schier durch. En Löwe, en Bär ond a Sau treffat sich em Wald. No prahlt dr Löwe: „Wenn i brüll, no hot dr ganze Dschungel Angscht.“ Dodurf gibt dr Bär a: „Des isch doch garnix. Wenn i brüll, no hot dr ganze Wald Angscht!“ Dodruf meldet sich dui Sau ganz locker: „Des isch jo boides guad, aber wen i huaschte, no hot die ganze Welt Angscht!“

Bloß dia Badener brauchat koi Angscht han. Die kriagat sicher koi Schweinegrippe. Schließlich hend dia Schweinegrippevira au ihren stolz.

Bis näggschd Woch' – ond:
Bleibat xond!
Ihr
Wulf Wager